

Akk.no. 4005  
Grønland

## MELDING FRA FISKERIDIREKTØREN

J. 33/83

## FORSKRIFTER OM REGULERING AV REKEFISKET VED VEST- OG AUST-GRØNLAND I 1983.

I medhald av §§ 1 og 4 i lov av 17. juni 1955 om saltvannsfiskerierne, jfr. kgl. res. av 17. januar 1964, og § 10 i lov av 16. juni 1972 om regulering av deltakelsen i fisket, jfr. kgl. res. av 8. september 1972, har Fiskeridepartementet 8. mars 1983 bestemt:

## § 1

Det er forbode å fiske reker ved Vest-Grønland (NAFO-område 1) og i EF-sona ved Aust-Grønland (ICES-område XIV og Va).

Utan hinder av forbudet i første ledd kan norske fiskarar i 1983 fiske 500 tonn reker ved Vest-Grønland i NAFO-område 1 sør for 68° n.br. og 2000 tonn reker i EF-sona ved Aust-Grønland i ICES-områda XIV og Va.

## § 2

Totalkvoten på 2000 tonn ved Aust-Grønland skal fordelast på dei deltakande farty etter inndeling i følgjande grupper på grunnlag av godkjend lastekapasitet:

- a) under 80 tonn
- b) 80 til 99,9 tonn
- c) 100 til 129,9 tonn
- d) 130 tonn til 159,9 tonn
- e) 160 tonn til 199,9 tonn
- f) 200 tonn og meir.

Fartykvotane blir utrekna slik: 50 % av totalkvoten blir delt med likt kvantum på kvart farty. Dei resterande 50 % blir delt på fartya etter den gjennomsnittlege lastekapasiteten i gruppene.

Ingen farty skal tildelast ein fartykvote som er større enn fartyet sin godkjende lastekapasitet.

## § 3

Totalkvoten på 500 tonn ved Vest-Grønland skal delast på farty som seinast 21. mars 1983 er påmelde til Fiskeridirektøren for fiske ved Vest-Grønland i 1983. Dersom den samla godkjende lastekapasiteten til dei påmelde fartya overstig 500 tonn skal kvoten delast etter loddtrekning til 4 av dei påmelde fartya med 125 tonn til kvart farty.

Dersom nokon av dei uttrekte fartya har ein godkjend lastekapasitet som er mindre enn 125 tonn, skal fartyet sin kvote setjast lik den godkjende lastekapasiteten.

Den resterande delen av den norske totalkvoten skal då delast i høve til storleiken på lastekapasiteten til dei uttrekte fartya med godkjend lastekapasitet større enn 125 tonn.

Dersom det 21. mars ikkje er påmelde farty for fiske ved Vest-Grønland med ein samla godkjend lastekapasitet på minst 470 tonn, blir det opna for fritt fiske frå den 22. mars 1983 fram til totalkvoten på 500 tonn er oppfiska.

#### § 4

Fiskeridirektøren avgjer under kva gruppe det einskilde deltakande fartyet høyrer til, og fastset kvoten til det einskilde fartyet ved Vest-Grønland og Aust-Grønland.

Ved fastsetting av kvotar etter § 3 kan det gjerast slike justeringar som praktiske omsyn tilseier.

#### § 5

Deltakande farty må melde frå til Fiskeridirektoratet før avgang til feltet, og må sende kopi til Fiskeridirektoratet av dei meldingane som dei etter vilkåra i EF-lisensen er pålagde å sende EF-kommisjonen.

#### § 6

Fartykvotane etter §§ 2 og 4 ved Aust-Grønland (ICES-område XIV og Va) blir oppheva 16. april 1983 kl 0000 GMT.

Gjenstående del av den norske totalkvoten på 2000 tonn skal delast i samsvar med reglane i §§ 2 og 4 på dei fartya som seinast 15. april 1983 har starta fisket ved Aust-Grønland. Farty som på grunn av havari blir hindra frå å starte fisket ved Aust-Grønland seinast 15. april 1983 skal også takast med ved fordelinga av kvotar etter denne paragrafen.

Ingen farty skal tildelast mindre kvote etter denne paragrafen enn det kvantum som ikkje er oppfiska av kvoten fartyet hadde fram til 16. april 1983.

Kvotane fastsett etter denne paragrafen gjeld fram til 16. mai 1983. Deltakande farty kan etter 16. mai 1983 kl 0000 GMT fiske fritt fram til den totale kvoten på 2000 tonn er oppfiska.

#### § 7

Fartykvotane etter §§ 3 og 4 ved Vest-Grønland (NAFO-område 1) blir oppheva 15. august 1983 kl 0000 GMT. Deltakande farty kan etter 15. august 1983 kl 0000 GMT fiske fritt fram til den totale kvoten på 500 tonn er oppfiska.

#### § 8

Fiskeridirektøren kan fastsetje nærare forskrifter om gjennomføring og utfylling av reglane i desse forskriftene, under dette også forskrifter om dagleg rapporteringsplikt, prøvetaking og tidspunkt for stopp i fisket når det blir utrekna at kvotane er oppfiska.

#### § 9

Forsettleg eller aktaust brot på reglane i desse forskriftene eller på reglar gitt med heimel i desse forskriftene blir straffa med bøter etter straffelova § 339 nr. 2, dersom ikkje strengare straffereglar kan nyttast.

#### § 10

Desse forskriftene trer i kraft straks. Samtidig blir Fiskeridepartementets forskrifter av 31. januar 1983 om regulering av rekefisket ved Grønland i 1983 oppheva.

-----